

Porro *Fredericus* Imperator ejus nominis 1111 anno c10 cccclxv cum variis Prefecturis hæc Provincia regeretur, Comitatus titulo auxit, totamque *Udatricho* cuidam attribuit. Inde ad nostrum hoc usque ævum continuo Comites suos habet. Vrbes in hoc Comitatu mœnibus clausæ duę sunt *Embda* & *Aurichum*. *Embda* sive *Emdena*, vulgo *Emden*, Vrbs hujus regionis primaria & Emporium celeberrimum ad *Amis*is fluminis ostium, Portus oportunitate nobile, cujus alveus ita profundus est, ut navigia maxima passis velis admittat: propterea amplitudine opum, ædificiis publicis privatisque, & Civium multitudine omnibus non *Germaniæ* modo, verum etiam *Europæ* angulis innotuit. Inter ornamenta præcipua sunt Comitatus *Ædes* sumtuosæ, Templum magnificum & Domus Prætoria. Mira hic omnium rerum & exuberans copia videtur, non earum modo, quibus satis necessitati fieri, sed quibus voluptatis studium concitari queat. Præstat hoc Civibus, tam Portus & importationis commoditas, quam nativa *Frisiæ* (de qua modo diximus) ubertas. Vrbs a fluvio *Ems* nomen habet, quem *Tacitus* *Amisiam* vocat. Hic ille est fluvius ad quem *Drusiana* fossa egressæ legiones Romanę, itaque Oceano, secunda navigatione pervectæ sunt, ut refert *Tacitus* 11 *Annalium*. *Aurichum* urbs altera, Nobilium jucundissimus recessus ob *Silvas* & *Nemora*, in quibus aucupio vel venatione liberaliter sese exercent. Cives potentes habet mercaturę vel opificio alicui deditos. Arces & villæ in hoc Comitatu infinite sunt. Pagorum tantus numerus est, ut alter alterum interdum contingat. Horum magna pars, sive ædificiorum splendorem sive platearum amplitudinem, sive Incolarum frequentiam spectes, cum quibusdam *Germaniæ* urbibus potest contendere. Neque vero in iis omnes rustici & agricolæ: sunt & Mercatores, & Artificum varia genera; Nobiles etiam sparsim interjecti. Sunt & hic duo alii Comitatus, qui *Embdano* Comiti subjecti sunt, *Esen*sis & *Ieverensis* a primariis eorū *Opidis* sic dicti. *Ieverensis* ditio trans *Iadam* ad Occasum sita est, continetque pagos octodecim: ei Septentrionem versus qua se *Visurgis* in Mare exonerat, prætexuntur duæ Insulæ, *Wangeroga* & *Spikeroga*, desertę magna ex parte. *Esen*sis Comitatus ad littus Oceani contiguus est *Ieveriæ*: ab occasu *Berumen*si & *Auricen*si tractu: a Borea mari terminatur. Ejus Dominus *Haio ab Huseke* anno c10 cccxc quum petulantius vicinos infestaret, navesque *Bremen*siū in *Visurgi* interdum spoliaret, mariaque vicina piratis, terras prædonibus & grassatoribus suis impleret, tandem post leviores cum *Bremen*sibus pugnas quibus inferior fuit, quum *Esenam* confugisset, captus a *Bremen*sibus *Edoni V Vimmeke* Capitaneo *Ieverensi* traditus est. Qui eum fune canabino diu tortum strangulatumque tandem frustillatim dissecavit, eo quod sororem, quam in matrimonium duxerat nulla iusta de causa repudiasset. Est quoque in hac Tabula Comitatus *Delmenhorst*. Et Dominia *Ezer*, *Norden*, *Aurick*, *Iever*, *Vredeburg*, *Ovelgunne*, *Rheyde*. Flumina hic *Amis*is, *Visurgis*, *Iuda* & alia. Incolæ hujus regionis *Germanica* utuntur lingua: sed ad secretiora propria quadam & vernacula quam advenæ non intelligunt. Omnis generis opificia studiose exercent, aut agros colunt: aut mercaturam faciunt. Vestitus honestus: etiam rusticorum: ita ut ex vestitu eos pro *opidanis* quis duceret, *Fœmineus* sexus habitu multum ab aliis differente gaudet. Totam capitis comam in unum circum componunt, eumque multis argenteis deauratisque sphaerulis vel nodulis ornatum in tergum dependere sinunt. Caput ipsum in æstate reticulo ex rubri coloris serico

Flumina.
Opificia.
Vestitus.